

編號 1 號

【線上學習】李秉璋原作

神奇、神奇真神奇，上課毋使趕，交通毋會塞，想愛學麼个，就學麼个。先生任僱擇，時間任僱選，三光半夜乜做得，先生講啊生趣又分明。佢做得係學生仔个先生，乜做得做先生个先生，總講佢桃李滿天下，毋使準備拜師禮，毋使繳學費，你想愛學，佢就會教。

毋管你係聰明抑係蠢¹，佢都收。佢無擇學生仔、無擇時間、無擇所在，單淨擇你，擇你想愛學个心。這係學習个革命，這係時代个轉變。來啊盡急、來啊盡遽，跔得著就大進步，就像脣口有仙人指點，武功大進。

馬桶毋曉得修理有人教，電鋸仔毋曉得發，一步一步來，訣竅教你知。網路線个接頭線路毋會排，有人教你色神愛分明，花刺必駁照順序，家啦伙俚又特別，最尾同佢夾啊去，接頭插下網路通。

雖然講一個銀角仔毋會響，毋過先生大部分都係自家在該唱戲，講啊嘴角全波、精神飽滿、笑頭笑面，蓋像都毋會癢又有耐

心！一遍教毋會，再教一遍，你想愛學幾下到就學幾下到，學到你自家毋愛。

千里緣分一線牽，天下盡在僱彈指間。現代生活真鬆爽，有冷氣吹，毋使出門、毋使尖車，想愛仰仔學就仰仔學。就算係疫情時節，學校个線上教學，有息把仔無恁自由，毋過乜有人嶄然認真，一片聽課，一片查資料，正經係一踢三通，師傅帶入門，修行在個人。上課講義自家留，毋使抄，三個快速鍵一撚，滑鼠一點，講義隨存下來。

當日上課紀錄先生有錄製。驚你單淨係「用手機仔上課定定」，人毋知走啊哪仔去。故所先生上課會問問題，一半問，一半係在點名，看你心思有在無？認真上課个，回答無問題又會講頭就知尾，無用心个乜無問題，平平無問題，這個係毋知半件，故所無問題。連先生喊佢回答，佢就像在人間消失，無鏡頭、乜無回答聲，訊息欄項也無留字，故所佢正經係「用手機仔上課定定」。

線上學習，成就隨在人，每一個人都有揀擇个自由，愛對自家个人生負責。對自家未來正經个大方，就係同一切都貢獻在現下。今日个僱，成就天光日个僱。

¹ 蠢：音 ngong de[~]；形容人笨拙魯鈍。

編號 3 號

【鷓鴣飛啊飛】張瑞玲原作

打早，日頭正對東片鷓鴣背¹个背頂升跣起來，金哲哲仔又晟眼个金光射入天頂。佢踏等該臺一騎就響歸路个老腳踏車，來到佢个百果園，還話講今晡日日頭一出來就到，算蓋早了！無想著，正踏入園肚裡，隔壁種大梨个阿權哥就在該大聲咻了！「喂！日頭恁高了正到我，敢做有事？」

唉！佢都恁早了，還輸佢，這阿權哥係歸暗晡毋使睡係無？做麼个做得七早八早就來到了？心肝還想緊，嘴頂又毋肯認輸，就應佢：「無啦！毋係來做事，來看鷓鴣个啦！」

佢个林園在山龍園等个窩墘肚裡，係堵著像今晡日恁呢个好天時，打早就會有三、四隻大鷓鴣，在四周圍个山嶺頂飛啊飛。

同阿權哥个嘴鼓都還言打煞，聽著遠遠个所在傳來「咻！咻！」个聲，鷓鴣出來了！阿權哥看著鷓鴣出來，做等个山園事頭也毋想做了，跔等一陣來搨接梨个工人，坐在佢工寮个涼影下欣賞這場大自然个表演。

看佢等閉開長長个翼胛、跔等燒氣，慢慢仔迂、定定仔飛，

緊迂緊高、緊飛緊遠，尾頂變做天邊个一粒烏點，親像優雅个天頂王者，對天頂看佢等守護个土地。

下把仔，會看著佢等挺等胸脯、目盯盯仔停在脣口个樹樑頂高，好恬恬仔無聲無說就舂一路下²，一矚目，轉身又飛往上，尖尖利利个爪頂，夾等一尾挨著神頭个蛇哥伯，就一路「咻！咻！咻！」風神碌碌飛入密密个樹林裡背。

又有時節，看佢等在高高个天頂迂啊迂仔，忽然間，兩片翼胛一收，對天頂直直跌一路下，佢心肝肚還想等：「這隻鷓鴣這下定著穩死了！」毋過，看佢明明都會撞著地泥了，拓拓風翼胛一閉、利爪一伸，黏時在一矚目時間，厥利爪頂就抓著一隻圓身還在扭啊扭个大老鼠，一轉身又飛啊半天高了！

歸陣人看鷓鴣表演看啊嘴擘擘，有人講：「難怪，在這個林園做恁久事頭，難得看著蛇哥，就係有這兜鷓鴣守護這片土地，歇在這仔个老嫩大細正有好安心生活啊！」

¹ 鷓鴣背：音 ieu po^ˋ zui^ˋ；東勢東方山峰名，華語稱鳶嘴山。

² 舂一路下：音 zung^ˊ id^ˋ lu ha^ˊ；往下俯衝。

編號 5 號

【虎頭蜂叨著記】李政暉原作

分虎頭蜂叨著了！

該日朝晨去山頂邊水做事，無看著路脣个竹林頂項有大蜂窠，一下無細義揆著該支竹仔，佢等就尋著佢。惡豺豺个蜂仔黏時就飛啊佢四周圍緊迂，對佢个圓身黏過來。佢陪著一隻正知係虎頭蜂就嚇啊盡命牯走，一片退一片陪圓身同頭那毛頂个蜂仔。退到無蜂仔个所在正感覺頭那暈暈人怪怪，共快行歸屋下眠一下。

無幾久佢个頭那、圓身、手髀同脣下開始都會痛了：頭那感覺就像雲漂在天頂，又分人綁等，暈暈腫腫又纏纏，歸粒頭那暈暈無法度思考。左手个手巴掌腫啊像龜板，手痺痺、手指尾會伸毋會鉤；坐毋核又睡毋落覺，唉唉唧唧正式艱辛。係講有陰間，該時節个佢應該係歇在裡背。

落尾，分人送去病院掛急診。講著有十過隻个蜂仔叨著佢過後，醫生蓋認真對佢講：「普通來講，分虎頭蜂叨著二十針以上，就可能有生命个危險。這種蜂仔無解毒个血清，過傷重¹个有

時會引起過敏性休克抑係溶血个症頭，最好愛先通知你屋下个人。」醫生安排吊大筒射²、注射同抽血，交代佢先眠一下，係有麼个毋堵好愛黏時講。

等佢略略仔睡一下過後，感覺好加蓋多了，就想愛歸去。毋過，醫生愛佢疊加一下、觀察看啊，最好等尿个尿色正常；係講變烏暗泥色，就過麻煩，愛送大間病院。喚佢愛再等加一下，無麼个问题正做得出院。最尾，都無問題，醫生還係掛心个講：「開个藥仔愛照三餐食，有麼个無爽快就愛再共快過來哦！」

歸到屋下換衫褲个時節正知，總共叨著十六針，兩隻手髀發炎紅腫，一等癢。左手个手巴掌還係紅腫無感覺、頭那暈暈緊想愛睡目。睡到半夜盡命牯爪，癢啊險同皮掀開、爪入骨髓。食藥仔、擦藥仔無麼个效，堵好有人紹介講臺灣有一種牛樟菇做得強肝解毒，無定著對蜂毒有效。食過後，該暗晡正式有神，就好睡、毋會癢了。

這滿蜂仔叨个所在已經結疔了，看著這兜結个癩仔就再過一擺分佢想著：該時節个該兜蜂仔，佢一個人在山肚有幾危險。

¹ 傷重：音 song' dong；很嚴重。

² 吊大筒射：音 diau tai tung' sa；吊點滴。